



**Sullissinerit suut sumiiffinnilu suni neqeroorutigineqarnersut innuttaasunit qaqugukkulluunniit nalorngissutigineqaqqunagit peqqinnissaqarfiup sullissinerinut takussutissiap tamatigut nutarterneqartuarsimanissaa ullutsinnullu naleqqussarneqartuarsimanissaa qularnaarniarlugu Naalakkersuisut peqquneqarnissaannik Inatsisartut aalajangiiffigisassaattut siunnersuut..**

(Inatsisartunut ilaasortaq Anna Wangenheim, Demokraatit)

(Siullermeerneqarnera)

Qujanaq Demokraatit Inatsisartuni ilaasortaataannut Anna Wangenheim-imut pitsaasumik eqqarsaatigilluakkamillu siunnersuuteqaqqinneranut, peqqissutsimut tunngasumut.

Naliginnaasusussaagaluarpormi, Peqqinnissaqarfiup neqeroorutaasa eqeersimaartuunissaat nutartertuarnissaallu, piviusoq aallaavigalugu. Uagutsinnut Demokraatinut pingaartuuvoq, ammasuunissaq ersarissuunissarlu, innuttaasut pisinnaatitaaffitik periarfissatillu ilisimaariniassamatigut.

Isumaqarpungalu, ajorluinnartoq, Peqqissutsimut Naalakkersuisup nammineerluni sianigisimangimmagu Peqqinnissaqarfiup tunniussinnaasaasa nutarterneqarsimanginnerat. Tamanna tunngavigalugu Peqqissutsimut Naalakkersuisoq qinnuigissavara uku apeqqutit akeqqullugit:

- Qanoq sivisutigisumik Peqqissutsimut Naalakkersuisup ilisimasimavaa, tunniussinnaasat pitsaasumik nutarterneqarsimangitsut?

- Suna pissutaava, Peqqissutsimut Naalakkersuisup ajornartorsiummik taassuminnga iliuseqarsimanginneranut?

Akisussaafferujussuuvoq Naalakkersuisuni ilaasortaaneq suliassarpassuillu aaqqitassaallutik.

Peqqinnissaqarfimmut tunngatillugu ajoraluartumik allaangilaq, Peqqissutsimut Naalakkersuisoq seminar-ertitsinernik ulapputeqarnerusoq ajornartorsiutit maannakkorpiaq pisut aaqqinniarnernannit soorlu assersuutigalugu Peqqinnissaqarfiup tunniussinnaasaasa nutarternerat. Taanna pingaarnersiuiq Peqqissutsimut Naalakkersuisumit isumaqarpunga ajorluinnartoq, sakkortuumillu Peqqissutsimut Naalakkersuisoq kajumissaarusuppara pingaarnersiuihini allanngorteqqullugit.

Tamanna tunngavigalugu silatusaartumik siunnersut Demokraatit Inatsisartunut ilaasortaataannit Anna Wangenheim-imit akuereqqullugu innersuussutigaarput Ilaqutariinnermut- aamma Peqqissutsimut ataatsimiititaliami suliareqqinneqarnissaa innersuussutigalugu.